



Martin Candinas (pcd) en discurs cun Magdalena Martullo-Blocher. FOTOS G. VENZIN



Sandra Locher-Benguerel (ps) ha cuntanschi in resultat excellent e va uss a Berna.



Ils dus novelegids cussegliers nazionals: Anna Giacometti (pld) e Jon Pult (ps).



Il temp a Berna è passà per el: Duri Campell da la Partida burgais-democratica.



Adina sin il current: La directura da RTR, Ladina Heimgartner.



Continuitad en il Cussegl dals chantuns: Stefan Engler (pcd) e Martin Schmid (pld).

# Tranter euforia e dischillusiun

Blera cuntentientscha da la vart sanestra e tar las partidas cristiandemocrata e liberala

DAD ANDREAS CADONAU / ANR

■ **Ils presidents da las partidas liberala e socialdemocrata Bruno Claus e Philipp Wilhelm èn satisfats dad ina vart dal return liberal en il parlament nazional e dal secund sez recaltgà da la vart socialdemocrata/verda.** Per ils presidents da las partidas burgaisdemocrata e populara Benno Niggli e Heinz Brand nun è il resultat exnum ina surpraisa, els èn tuttina trumpads.

Il president da la partida socialdemocrata (ps) Philipp Wilhelm ha gù fadia da chattar ils peds suenter ch'ìls resultats da la citad da Cuira en finalmain stads sin maissa. El ha discurs dad ina ferma voluntad da candidatas e candidats e da la partida da recaltgar in secund sez per la vart sanestra e verda en il chantun Grischun. Ed el ha ludà l'engaschi da tut ils participants da cuntanscher quai secund sez suenter otg onns. La politica da la ps da tematisar dapi onns l'ambient ed il clima saja sa verifitgada. Grazia era al sustegn dal partenari, la partida verda. La pli enconuschenta exponenta da quella partida, Anita Mazzetta, ha remartgà il success dal secund sez cun satisfaziun, dentant era il resultat da la atgna partida. Ed il terz partenari en la cuminanza ecologica climatica, la partida verdliberala, ha manchentà quai secund sez per sulet 64

vuschs. Dentant nagin motiv da sa lamentar per il president dals verdliberals, Gaudenz Bavler. El vesa èn la nova cussegliera nazionala Sandra Locher Benguerel ina buna represchentanta grischuna en il Cussegl nazional che resguardia medemamain ils interess da la part verdliberala dal chantun Grischun. Bruno Claus, president da la pld, ha medemamain pudì respunder a las dumondas cun fatschieria. La strategia liberala ha la finfinala chattà success e la nova represchentanza liberala en il Cussegl nazional sper quella en il Cussegl dals chantuns emplencha il president da la pld cun dabia satisfaziun. Che gist la candidata Anna Giacometti ha cuntanschi las bleras vuschs da las atgnas candidatas e candidats, nun è stà cler per Claus. El ha ditg che la glista saja stada ulivada. Gist en mancanza dad in candidat en uffizi saja la cursa stada averta.

## Cunter tuttas prognosas

Ed in ulteriur president da partida ha pudì rir la dumengia suenter la publicaziun dals resultats. Atgnamain in dubel surrir, ina giada davart il resultat da sia partida, la cristiandemocrata che ha pudì mantegnair sia basa d'elecziun, e sa chapescha en vista dal excellent resultat dal candidat Martin Candinas. Bler plaschair ha il president da la pcd esprimì vers ils resul-

tats da la glista giuvna ch'el ha valetà per in empermettent signal per il futur da la partida. E cuntent è il nievelegi cusseglier dals chantuns Stefan Engler sa chapescha era cun ses agen resultat. Visavi al grond dumber da candidatas e candidats na sa chapeschia in tal resultat betg da sasez. Main empernaivla sa preschenta la situaziun dal president da la partida populara, Heinz Brand. Dad ina vart ha el pudì far attent a la excellenta reelecziun da Magdalena Martullo-Blocher en il Cussegl nazional. En la sumbriva da quai fitg bun resultat stat la sperdita dal secund sez da la pps. Surstà da la sperdita nun è Brand betg stà. El ha ditg dad esser stà pertschart ch'ì pudessia daventar stretg en vista dal resultat d'avant quatter onns nua che la pps haja retschavi il secund sez cun sulet 100 vuschs differenza. Ch'ì haja tutgà el persunalmain, saja da resguardar e Brand ha explitgà dad esser pront per la pensiun politica. Trumpà da la sperdita dal sez en il cussegl nazional è il president da la partida burgaisdemocrata (pbd) Benno Niggli. Ch'ì na saja betg reussi a candidatas e candidats en las regiuns da cuntanscher las vuschs necessarias per segirar il sez da Duri Campell, dettia da patertgar. In radi da speranza è per Niggli l'engaschi politic dals giuvens, e la pbd vegnia a contactar la basa per discutir l'avegnir da la partida.



Terrada malgrad passà 17'000 vuschs: Heinz Brand da la Partida populara Svizra.